

摘藻堂四庫全書薈要

集部

欽定四庫全書薈要

集部

御定詠物詩選

卷八至十

詳校官原任主事

臣李斯咏

欽定四庫全書薈要卷一萬八千六百三十

集部

御定佩文齋詠物詩選卷八

雲類



四言古

卿雲歌

古逸詩

卿雲爛子糾縵縵子日月光華旦復旦子

吹雲贊

魏
曹植

天地變化是生神物吹雲吐潤浮氣蓊鬱

卿雲贊

宋武帝

非煙非雲曳紫流光懸華曜藻奄鬱臺堂粵予休明震
乎珍祥積慶有文靈貺無疆

慶雲章

唐陳子昂

崑崙元氣實生慶雲大人作矣五色氤氲昔在媯帝南
風旣薰叢芳爛熳郁郁紛紛曠矣千祀慶雲來止玉葉
金枝祚我天子非我天子慶雲誰昌非我聖母慶雲誰
光慶雲光矣周道昌矣九萬八千天授皇年

雲門二章

唐
元結

元雲溶溶兮垂雨濛濛
類我聖澤兮涵濡不窮

其二

元雲漠漠兮含映逾光
類我聖德兮普被無方

五言古

詠雲

梁
簡文帝

浮雲舒五色
瑪瑙應霜天
玉葉散秋影
金風飄紫煙

和王中書德元詠白雲

梁
沈約

白雲自帝鄉氛氲屢迴沒蔽虧崑山樹含吐瑤臺月秋
風西北起飄我過城闕城闕已參差白雲復離離皎潔
在天漢倒影入華池將過丹丘野時至碧林垂九重迎
飛鵠萬里送翔螭

詔問山中何所有賦詩以答

梁

陶弘景

山中何所有嶺上多白雲只可自怡悅不堪持寄君

詠雲

梁

吳均

飄飄上碧虛藹藹隱青林氛氲如有意縈拂詎無心

賦得新雲

陳
張正見

西北春雲起遙臨偃蓋松根危纔吐葉氣淺未成峰風
前飛未斷日處影疑重體輕無五色詎是得從龍

賦得白雲臨酒

張正見

白雲蓋濡水流彩入澗川疎葉臨嵇竹輕鱗入鄭船菊
汎金枝下峰斷玉山前一朝開五色飄飄映十千

賦得處處春雲生

陳
蔡凝

春色徧空明春雲處處生入風衣暫飲隨車蓋轉輕作

葉還依樹為樓欲近城含愁上對影似有別離情

賦得含峰雲

唐

太宗

翠樓含曉霧蓮峰帶晚雲玉葉依巖聚金枝觸石分
橫天結陣影逐吹起羅紋非復陽臺下空將頌楚君

詠雲

唐

于季子

瑞雲千里映祥輝四望新隨風亂鳥翼汎水結魚鱗
布葉疑臨夏開花詎待春願得承佳景無令掩桂輪

雲

唐

李嶠

大梁白雲起氛氲殊未歇錦文觸石來蓋影凌天發烟
煴萬年樹掩映三秋月會入大風歌從龍赴圓闕

賦得白雲抱幽石

唐
駱賓王

重巖抱危石幽澗曳輕雲繞鎮仙衣動飄蓬羽蓋分錦
色連花靜苔光帶葉薰詎知吳會影長抱穀城文

賦得日暮碧雲合

唐
許康佐

日際微陰生天涯暮雲碧重重初似蓋沈沈乍如積林
色黯疑暝隙光俄已夕出岫且從龍縈空寧觸石餘輝

淡瑤草浮影凝綺席時景儻能留幾思輕尺璧

觀雲篇

唐
劉禹錫

興雲感陰氣疾足如見幾晴來意態行有若功成歸蔥
龍含晚景潔素凝秋輝夜深度銀漢漠漠仙人衣

谿雲

唐
僧皎然

舒卷意何窮縈流復帶空有形不累物無迹去隨風莫
怪長相逐飄然與我同

孤雲

元
劉因

孤雲生幾時冉冉何所適
豈無崑華高道遠嗟獨力徘徊
天中央明月為顏色下有幽棲士
歲晏倚青壁朝飲澗下泉
暮拂松間石相對澹忘情
倒景寒潭碧

春雲

元馬祖常

高雲起城闕流離度庭樹
依風拂迴塘波顚光景注遙
林帶踈煙照日亂縈縷
婉孌浮朝陽空明映輕霧
嵐翠含玉輝光采滿巖嶼
逍遙幽賞諧緬邈世娛阻

題李溉之學士白雲半間

元虞集

山中多白雲何由到城邑招之恐不來欲攬遽無迹棲
檐候晨光納牖作秋色用冲不為盈常住寧為客分張
任蒼松散落還白石日照香爐峰月射仙掌側有恩封
一鄉與子當共食

望雲

元
黃石翁

日出五丈高白雲浩如海城郭在雲中山人在雲外望
雲雲氣深入雲雲氣淺亦欲入深雲不知雲近遠

七言古

附長短句

雩祭歌

齊謝朓

族雲鬱鬱溫風扇興雨祁祁黍苗徧

同李九士曹觀畫壁雲作

唐高適

始知帝鄉客能畫蒼梧雲秋天萬里一片色只疑飛盡
猶氛氲

火山雲歌送別

唐岑參

火山突兀赤亭口火山五月火雲厚火雲滿山凝未開
飛鳥千里不敢來平明乍逐邊風斷薄暮渾隨塞雨回

繚繞斜吞鐵關樹氛氲半掩交河戍迢迢征路大山東
山上孤雲隨馬去

白雲歌送劉十六歸山

唐李白

楚山秦山皆白雲白雲處處長隨君君入楚山裏雲亦
隨君渡湘水湘水上女蘿衣白雲堪卧君早歸

題春雲出谷圖

金党懷英

春雲乍出山有無春雲已去春山孤山光空濛不可寫
正要雲氣相縈紆山吞雲吐變明晦半與巖谷生朝晡

輕陰霏霏暗谿樹餘影漠漠開樵居舟人艤棹竝沙尾
坐看縹緲搖空虛巧分天趣出畫外韻遠不與丹青俱
今人重古不知畫但愛屋漏煙煤污惜哉東坡不及見
此本獨有疊嶂烟江圖

龍井曉雲

元
胡炳文

華光殿東泉有靈下穴空洞神功冥當時忽見蒼蚪精
年年簫鼓來相迎五風十雨今年好靈物不煩人致禱
非烟非霧騰清晨五色祥光煥晴昊

白雲軒

明 劉 溥

山中多白雲天上多清風清風解炎熱白雲自西東江
頭坐看雲起處一片從龍天上去化為甘雨潤枯苗不
作繁陰宿高樹清風泠泠吹我衣還送白雲天上飛天
香不斷瑤草碧何處玉笙騎鶴歸

五言律

雲

唐 李 嶠

英英大梁國郁郁祕書臺
碧落從龍起青山觸石來
官

名光邃古蓋影耿輕埃飛感高歌發威加四海迴

賦得雲生棟梁間

唐陳希烈

一片蒼梧意氤氲生棟梁下簾山足暗開戶日添光偏
使衣裘潤能令枕簟涼無心伴行雨何必夢荆王

雲

唐杜甫

龍以瞿塘會江依白帝深終年常起峽每夜必通林
收獲辭霜渚分明在夕岑高齋非一處秀色豁煩襟

和中書侍郎院壁畫雲

唐李叔

粉壁畫雲成如能上太清影從霄漢發光照掖垣明映
篠多幽趣臨軒得野情獨思作霖雨沅潤及羣生

奉和中書徐侍郎中書省翫白雲寄潁陽趙大

唐
儲光羲

青闕朝初退白雲遙在天非關取雷雨故欲伴神仙汎
灩駕池曲飄飄瑣闥前猶多遠山意幸入侍臣篇

賦得歸雲送李友人歸華山
唐
錢起

秀色橫千里歸雲積幾重欲依毛女袖初卷少姨峰盍

影隨征馬衣香拂卧龍祇應函谷上真氣日溶溶

詠雲

唐
李商隱

捧月三更斷藏星七夕明纔聞飄迴路旋見隔重城潭
暮隨龍起河秋壓雁聲只應惟宋玉知是楚神名

孤雲

元
程鉅夫

渺渺從何起亭亭只自飛朝隨風鶴去暮逐雨龍歸幾
度超滄海多應點翠微何時能借我裁作羽人衣

江雲

明
薛蕙

謝客弄春水江臯生彩雲紛紛初散綺葉葉漸成文蔽
日皆相映流風乍不分何因可持贈欲以慰離羣

五言排律

省試白雲起封中

唐

陳希烈

千年泰山頂雲起漢王封不作奇峰狀寧分觸石容為
霖雖易得表聖自難逢冉冉排空上依依疊影重素光
非曳練靈貺是從龍豈學無心出東西任所從

春雲

唐

裴澄

漠漠復溶溶，乘春任所從。
映林初展葉，觸石未成峰。
旭日消寒翠，晴煙點淨容。
霏微將似散，深淺又如重。
薄彩臨谿淡，輕陰帶雨濃。
空餘負樵者，嶺上自相逢。

省試觀慶雲圖

唐柳宗元

設色初成象，卿雲示國都。
九天開祕祉，百辟贊嘉謨。
抱日依龍袞，非煙近御爐。
高標連汗漫，回望接虛無。
裂素榮光發，舒華瑞色敷。
恒將配堯德，垂慶代河圖。

賦得白雲起封中

唐張嗣初

英英白雲起呈瑞出封中表聖寧因地逢時豈待風浮
光彌皎潔流影更冲融自叶堯年美誰云漢日同金泥
光乍掩玉檢氣潜通欲與非煙竝亭亭不散空

賦得青雲千呂

唐林藻

應節偏千呂亭亭在紫氛綴雲初度影捧日已成文結
蓋祥光迴為樓翠色分還同起封上更似出橫汾作瑞
來藩國呈形表聖君徘徊如有託誰道比閒雲

山出雲

唐張復

山靜雲初吐，霏微觸石新。
無心離碧岫，有意占青春。
散類如虹氣，輕同不讓塵。
凌空還似翼，映澗欲成鱗。
起異臨汾鼎，凝隨出峽神。
為霖終濟旱，非獨降賢人。

華山慶雲見

唐失名

聖主祠名岳，高峰發慶雲。
金柯初繚繞，玉葉漸氤氲。
氣色含珠日，光明吐翠雰。
依稀來鶴態，彷彿列仙羣。
萬樹流光影，千潭寫錦文。
蒼生欣有望，祥瑞在吾君。

七言律

慶雲見

唐李紳

禮成中岳陳金冊祥報卿雲冠玉峰輕未透林疑待鳳
細非行雨詎從龍卷風變彩霏微薄照日籠光映隱重
還入九霄成沆瀣夕嵐生處鶴歸松

白石湫雲

元柳貫

白石靈山望贊皇湫潭此復見蒼蒼飄揚直欲凌三際
膚寸猶能雨八荒空外金精懸太白泉中蚪彩化長黃
傳芭奏罷神絃曲松蓋成陰澤氣涼

白石湫雲

元 吳 萊

獨上南山最上頭，朝隤一點便成湫。
巖腰動石風初起，海眼輸泉雨欲流。
蜥蜴含珠光照夜，豐隆卷鐵黑沈秋。
明當去挾騎龍吏，直到扶桑第幾洲。

瓊島春雲

明 楊 榮

仙島依微近紫清，春光澹蕩暖雲生。
乍經樹杪和煙濕，輕覆花枝過雨晴。
每日氤氲浮玉殿，常時縹緲護金莖。
從龍處處施甘澤，四海謳歌樂治平。

瓊島春雲

明
李東陽

瑤峰獨立倚空蒼
雲去雲來兩不妨
旋逐春寒生苑樹
更隨晴日度宮牆
玉皇居處重樓擁
太史占時五色光
若與山龍同作繪
也須能補舜衣裳

和趙庫部元實景雲篇

明
呂高

卿雲郁郁覆中天
爛結緋文五色鮮
光泛紫霄流鳳蓋
影隨金闕照龍旃
漸看捧日歸仙掌
故欲從龍裊御筵
此日仙郎揮藻賦
蓬萊親獻沐恩偏

五言絕句

文杏館

唐王維

文杏裁為梁，香茅結為宇。
不知棟裏雲，去作人間雨。

尋隱者不遇

唐賈島

松下問童子，言師采藥去。
只在此山中，雲深不知處。

谿口雲

唐張文姬

一片谿口雲，纔向谿中吐。
不復歸谿中，還作谿中雨。

衡岳道中

宋陳與義

城中望衡山浮雲作飛蓋
竭來巖谷遊却在浮雲外

雲社

宋朱子

自作山中人即與雲為友
一嘯雨紛紛無勞三奠酒

雲莊

朱子

小丘橫翠几層嶂復嵯峨
釋耒閒來看巖姿此處多

題柯敬仲雜畫

元虞集

北苑今仍在南宮奈老何
青山解浮動端為白雲多

和鐵崖小臨海

元張簡

偶坐松根石相看說大還昆侖雲一朵喚作九華山

囊雲詩

明 朱 權

蒸入琴書潤粘來几榻寒小齋非嶺上弘景坐相看

卧雲室

明 高 啓

夕卧白雲合朝起白雲開惟有心長在不隨雲去來

太和縣

明 張以寧

曉挂船窗看蒼茫暝色分前山知有雨流出滿江雲

卧雲室

明 謝 徵

朝卧白雲東暮卧白雲西白雲長共我此地結幽棲

宿華亭寺

明 楊慎

天風與海水鳴籟隔山聞夜半衣裳濕深林罩暮雲

贈楊孝父

明 范汭

清時有隱者自汲還自耘翳然茅屋上一片堯時雲

閒雲

明 僧大香

閒雲不作雨橫入峽山去峽口弄舟人家在雲歸處

六言絕句

題畫

元 薩都拉

綠樹深藏野寺白雲影落谿船遮却青山一半只疑僧
舍茶煙

題青山白雲

元 張昱

一箇茅廬何處小橋古木谿灣但見山青雲白不知天
上人問

福嚴即事

元 僧善住

邨邊幾株紅樹屋外四面青山終日無人能到孤雲薄

暮飛還

七言絕句

過標陽山谿

唐陳羽

衆草穿沙芳色齊，踏莎行草過春谿。
閒雲相引上山去，人到山頭雲却低。

諷山雲

唐施肩吾

閒雲生葉不生根，常被重重蔽石門。
賴有風簾能掃蕩，滿山晴日照乾坤。

灞上

唐
綦毋潛著

鳴鞭曉日禁城東
渭水晴煙灞岸風
却傍柳陰回首望
春天樓閣五雲中

柏林寺南望

唐
郎士元

谿上遙聞精舍鐘
泊舟微徑度深松
青山霽後雲猶在
畫出西南四五峰

雲

唐
杜牧

盡日看雲首不回
無心都道似無才
可憐光彩一片玉

萬里青天何處來

雲

唐來鵠

千形萬象竟還空
映水藏山片復重
無限黍苗皆望澤
悠悠閒處作奇峰

孤雲

唐張喬

舒卷因風何所之
碧天孤影勢遲遲
莫言長是無心物
還有隨龍作雨時

望雲樓

宋蘇軾

陰晴朝暮幾回新已向虛空付此身
出本無心歸亦好
白雲還似望雲人

偶題

宋
朱子

門外青山紫翠堆
幅巾終日面崔嵬
只看雲斷成飛雨
不道雲從底處來

病中絕句

宋
范成大

簾頭排溜密如簾
谿上層陰乍解嚴
最是看山奇絕處
白雲堆絮擁青尖

雲卧菴

宋 楊萬里

十年兩袖軟紅塵
歸濯滄浪且幅巾
不是白雲留我住
我留雲住卧閒身

明發瀧頭

楊萬里

黑甜偏至五更濃
強起侵星敢小慵
輸與山雲能樣嬾
日高猶宿夜來峰

舟上

宋 徐照

小船停槳逐潮還
三五人家住一灣
貪看曉光侵月色

不知雲氣失前山

曉雲次子端韻

金
党懷英

灤谿經雨浪生花
曉碧翻光漾
曉霞川上風
煙無定態
盡供新意與詩家

山行

金
趙秉文

石頭牽確水縱橫
過雨山間草屨輕
未到上方先滿意
倚天青壁白雲生

留題西谿

金
趙
風

波光湛碧冷無痕渺渺輕風起
縠紋認得朝來踈雨過
却從水底見飛雲

閻立本秋嶺歸雲圖

元 鄧文原

貞觀從知有畫仙
能將萬里尺圖間
白雲掩映楓林好
遮却谿南無數山

贈白雲

元 虞集

白雲東去又經春
每想飛鴻到水濱
幾箇遮山松樹子
憑君灑雨洗埃塵

青山白雲圖

虞集

獨向山中訪隱君，行從千澗去沄沄。
仙家更在空青外，只許人間禮白雲。

宿浚儀公湖亭

元楊載

兩兩三三白鳥飛，背人斜去落漁磯。
雨餘不遣濃雲散，猶向前山擁翠微。

行界牌源道次小憩民舍

元柳貫

小谷疎林受數家，年芳猶有刺桐花。
白雲不為青山地，

截斷前峰作髻了

層樓即事

元

薩都拉

浴罷焚香掃閣眠過牆新竹翠娟娟半空雲氣層樓暗
四月江東欲雨天

灤京雜詠

元

楊允孚

正元紫禁肅朝儀御榻中間寶帕提王母壽詞歌未徹
雪花片片彩雲低

用前韻叙山家幽寂之趣

元

葉顥

夕陽香逕逐東風
短策輕扶數落紅
信步偶隨流水去
不知身到白雲中

明德游仙詞

元張雨

夜久扶桑海色分
珠宮望拜赤龍君
洞庭未省君山在
元是昆侖一朵雲

一峯雲外菴

元僧惟則

衲被蒙頭宿火紅
雪寒愁聽上方鐘
開門忽怪山為海
萬疊雲濤露一峰

宿卧雲軒

明 陳憲章

不妨到處與人羣
借宿山齋酒半醺
我得五龍傳睡法
枕痕猶帶華山雲

題畫

明 文徵明

過雨空林萬壑奔
夕陽野色小橋分
春山何似秋山好
紅葉青山鎖白雲

題畫

明 王璉

渡頭初唱采蓮歌
南浦西風漲綠波
正是晚涼新雨後

青山不似白雲多

西清詞

明
黃佐

碧殿崢嶸聚泰清
飈臺時送步虛聲
流鈴擲火飛章地
一片雲遮翡翠城

其二

輦道陰森萬柳齊
水晶簾幙動晴霓
六龍行處金螭合
冉冉紅雲閤苑西

同朝天宮道士朝回口號

明
僧來復

羽仙飛佩曉冷風禪子金襴映日紅共祝太平朝帝闕
蓬萊兜率五雲中

山居

明
僧德清

平湖秋水浸寒空古木霜餘落葉紅
石逕小橋人迹斷
一菴深鎖白雲中

祇樹菴

明
僧洪恩

竹映窗前水漱門數聲幽鳥報朝昏
行來恐踏苔痕破
目送山雲過遠邨

欽定四庫全書

御定詠物詩選

御定佩文齋詠物詩選卷八

欽定四庫全書薈要卷一萬八千六百三十一集部

御定佩文齋詠物詩選卷九

霞類

五言古

早望海邊霞

唐李白

四明三千里朝起赤城霞日出紅光散分輝照雪崖一
餐嚙瓊液五內發金沙舉手何所待青龍白虎車

曉發飛鳥驛晨霞滿天少刻大雨吳諺云朝霞

不出門暮霞行千里驗之信然戲紀其事

宋
范成大

朝霞不出門暮霞行千里今晨日未出曉氣散如綺心
疑雨再作眼轉雲四起我豈知天道吳農諺云爾古來
占滂沱說者類恢詭飛雲走羣羊停雲浴三豕月當天
畢宿風自少女起爛石燒成香汗礎潤如洗逐婦鳩能
拙穴居狸有智蜉蝣強知時商羊與聞計垤鳴東山鸛
堂審南柯蟻或加陰石鞭或議陽門閉或云逢庚變或

自換甲始刑，鷺與象龍聚。訟非一理，不如老農諺。響應捷如鬼，哦詩敢夸博。聊用醒午睡。

五言律

江霞

明薛蕙

春江變氣候，孤嶼發雲霞。散影搖青草，流文漾碧沙。紅泥迷燕子，丹洞失桃花。水宿淹晨暮，應懷謝永嘉。

七言律

霞

唐韓琮

應是行雲未擬歸變成春態媚晴暉深如綺色斜分閣
碎似花光散滿衣天際欲銷重慘淡鏡中間照正依稀
曉來何處低臨水無限鴛鴦妒不飛

飛霞樓

元
朱德潤

綺結飛霞散滿空闌干高倚夕陽中冲融畫錦橫窗碧
絢爛晴光入座紅宛有霓旌來漢表直疑蜃氣出城東
樓居自是神仙宅不待乘橋躡彩虹

五言絕句

丹霞塢

明高啓

遥聞丹霞塢中有餐霞者絳彩發朝朝還同赤城下

和陳伯孺西湖

明柳應芳

偶向武林遊曾於天竺住明日欲離山晴霞故變雨

錢幼卿朝霞館詩

明僧通凡

遠樹無煙時前山未雲起晞髮臨東軒衣裳半身紫

七言絕句

臨海所居

唐顧況

此去臨谿不是遙樓中望見赤城標不知疊嶂重霞裏
更有何人度石橋

舟次鼇湖阻水因遊董山

宋 朱 棹

拂拂朝霞到客舟苦疑雨意在鳴鳩好峰天半元相識
且作僧牀挾策遊

晚霞

宋 朱 子

日落西南第幾峰斷霞千里抹殘紅上方傑閣憑闌處
欲盡餘暉怯晚風

遊百家巖雜詩

元王惲

月池懸溜落蒼窪巖竇分居可百家不羨碧瀾秋色好
倚天驚絕赤城霞

小遊仙

明王澤

東度扶桑看日華却隨王母借飈車夜涼海色平如掌
倒看青天起赤霞

漫成

明韓邦靖

漆沮河邊兩岸沙遶隄十里盡桃花春風縱使隨流水

欽定四庫全書

御定詠物詩選
卷九

落日猶堪鬪彩霞

御定佩文齋詠物詩選卷九

欽定四庫全書蒼齋要卷一萬八千六百三十二

集部

御定佩文齋詠物詩選卷十

雨類

三言古

雩祭歌

齊
謝朓

有渰興膚寸積雨冥冥又終夕

四言古

奉和聖製喜雨

唐
張九齡

艱我稼穡載育載亭隨物應之曷聖與靈謂我何憑惟
德之馨誰云天遠以誠必至太清無雲義和頓轡于斯
蒸人瞻彼非覲陰冥倏忽霈澤咸洎何以致之我后之
感無旱無隰黍稷黝黝無卉無木敷芬黝黝黃龍勿來
鳴鳥不思人和年豐皇心則怡豈與周宣雲漢徒詩

五言古

喜雨詩

魏
曹植

天覆何彌廣苞育此羣生棄之乃憔悴惠之則滋榮慶

雲從北來鬱述西南征時雨中夜降長雷周我庭嘉種
盈膏壤登秋必有成

喜雨

宋
謝莊

燕起知風舞礎潤識雲流
列泉承夜湛零雨望晨浮
合穎行盛茂分穗方盈疇

喜雨

宋
謝惠連

朱明振炎氣溽暑扇溫飈
羨彼明月輝離畢經中宵
思此西郊雲既雨盈崇朝
上天憫憔悴商羊自吟謠

賦得入階雨

梁簡文帝

細雨階前入，灑砌復沾帷。
漬花枝覺重，濕鳥羽飛遲。
儻令斜日照，併欲似游絲。

細雨

梁元帝

風輕不動葉，雨細未沾衣。
入樓如霧上，拂馬似塵飛。

和皇太子春林晚雨

梁劉孝威

雲樹交為密，雨日共成虹。
雷舒長男氣，枝搖少女風。
葉珠隨滴水，簷繩下溜空。
蝶濡飛不颺，花沾色更紅。
明離

信養德能事冠春宮誰堪偶鳳吹惟有浮丘公

擬雨詩

梁虞騫

清風送涼氣薄暮蕩炎氛虹照連漪水電出嵯峨雲落
暉散長足細雨織斜文

對雨

梁朱超

當夏苦炎埃習靜對花臺落照依山盡浮涼帶雨來重
雲吐飛電高棟響行雷灑樹輕花發滴沼細萍開汎沫
縈階草奔流起砌苔無因假輕蓋徒然想上才

閒居對雨

陳陰鏗

蘋藻降靈祇聰明諒在斯觸石朝雲起從星夜月離八
川奔巨壑萬頃溢澄陂綠野含膏潤青山帶濯枝嘉禾
方合穎秀麥已分歧寄語紛綸學持竿詎必知

對雨

北齊劉逖

重輪宵離畢行雨旦浮空細落疑含霧斜飛覺帶風濕
槐仍足綠沾桃更上紅無由似玄豹縱意坐山中

賦得微雨從東來應教

隋諸葛穎

微雨閭東峰散漫灑長松
澗滿新流濁山沾積翠濃
風起還吹燕雲來本送龍
登年隨玉燭名山定可封

詠雨

唐太宗

和風吹綠野梅雨灑芳田
新流添舊澗宿霧足朝煙
鴈濕行無次花沾色更鮮
對此欣登歲披襟弄五絃

發營逢雨應詔

唐虞世南

豫遊欣勝地皇澤乃先天
油雲陰御道膏雨潤公田
隴麥霑逾翠山花濕更然
稼穡良所重方復悅豐年

李士曹廳對雨

唐

錢起

春雨暗重城
訟庭深更寂
終朝人吏少
滿院煙雲集
濕鳥壓花枝
新苔宜砌石
掾曹富文史
清興對詞客
愛爾蕙蘭叢
芳香飽時澤

喜雨

唐

戴叔倫

閒居倦時燠
開軒俯平林
雷聲殷遙空
雲氣布層陰
川上風雨來
灑然滌煩襟
田家共歡笑
溝澮亦已深
團團聚鄰曲
斗酒相與斟
樵歌野曲中
漁釣滄江潯
蒼天暨

有念悠悠終我心

郡中對雨贈元錫兼簡楊凌

唐

韋應物

宿雨冒空山寒城響秋葉沈沈暮色至淒淒涼氣入蕭
條林表散的皦荷上集夜霧著衣重新苔侵履濕遇茲
端居日賴與嘉賓接

對雨寄韓庫部協

唐

韋應物

颯至池館涼靄然和曉霧蕭條集新荷氤氲散高樹閒
居興方澹然想心已屢暫出仍濕衣况君東城住

開元寺樓對雨聯句

唐陸龜蒙

皮日休

海上風雨來掀轟，逐飛電登樓一凭檻。滿眼蛟龍戰，龜蒙

細灑心空冷橫飄。目能眩垂檐，珂珮喧爆瓦。珠璣濺，皮日休

遙瞻山露色漸覺雲成片。遠樹欲鳴蟬，深簾尚藏燕。龜蒙

殘雷隱轉盡反照，依微見。皮日休疎帆逗前渚，晚磬分涼殿。

龜蒙畢景好疎吟，餘涼可清晏。皮日休

客舍聽雨

宋朱子

沈沈蒼山郭，暮景含餘清。春靄起林際，滿空寒雨生。投

裝即虛館檐響通夕鳴遙想山齋夜蕭蕭木葉聲

對雨

朱子

虛堂一遐矚驟雨滿空至的皪散芳塘冥濛結雲氣勢
逐風威亂望窮山景翳煙靄集林端蒼茫欲無際涼氣
襲輕裾炎氛起秋思對此景淒淒還增冲澹意

瀟湘夜雨

元陳孚

昭潭黑雲起橘州風卷沙亂雨灑蓬急驚墮檣上鴉
鼃鼃互出沒暗浪鳴櫓牙漁燈半明滅濕光穿蘆花

雨中留徐七賁

明高啟

江寒宿雨在落葉滿邨濕
留君繫君艇莫犯風潮急
試問欲歸城誰家借簑笠

秋陰

明葛一龍

西爽忽自晦不知朝與昏
井上半殘葉湖中無遠村
桔槔幾日罷農牧相過存
雲澹一如水野風吹到門

七言古

細雨遙懷故人

唐李建勳

江雲未散春風暖溟濛正在高樓見細柳緣堤少過人
平蕪隔水時飛燕我有近詩誰與和憶君狂醉愁難破
昨夜南窗不得眠閒階點滴迴燈坐

茗溪風雨中章德茂同泛

元黃潛

黑風翻江白雨傾檣歌柁側斷人行此時惟我與章子
孤舟蕩漾烟波裏蒹葭蒼蒼楊柳黃浩歌擊舷興彌長
翩然一葉恣掀舞青山白塔頻低昂朝過城南暮城北
舟人問我將誰適章子掉頭作吳語秋水夜來深幾許

忽看大字標竹林寺門對水仍陰陰敲門見竹不見人
竹間翠石何蕭森迴舟少林雨如注四顧冥茫但煙霧
魚驚龍躍吾不知披蓑却入菰蒲去岸傍羣兒拍手呼
笑言狂客世所無嗚呼古人今則無後來視我知何如
為君留此有聲畫題作扁舟煙雨圖

瀟湘夜雨

明
宣宗

濃雲如墨黯江樹九疑山迷天欲暮蒼松巖下客維舟
魚龍鼓舞飛煙霧但見長空風雨來勢與雲夢相周迴

三湘淋漓瀉銀竹七澤洶湧翻春雷
長江橫絕巴陵北一水悠悠漾空碧
洪濤巨漲頃刻中虹橋隱隱無人迹
前谿遙見野人家槿籬茅屋半欹斜
高樓誰得江湖趣坐聽蕭蕭對燭花
隔浦鐘聲來遠寺曉色蒼涼喜開霽
青天萬里白雲收滿目湘山翠欲流

五言律

奉和詠雨應詔

唐許敬宗

舞商初赴節湘燕早迎秋飄絲交殿網
亂滴起池漚激

溜分龍闕斜飛灑鳳樓崇朝方決寓宸眄俯凝旒

奉和春日遊苑喜雨應詔

唐李嶠

仙蹕九重臺香筵萬壽杯一旬初降雨二月蚤聞雷葉
向朝躋密花含宿潤開幸承天澤豫無使日光催

雨

李嶠

西北雲膚起東南雨足來靈童出海見神女向臺迴斜
影風前合圓文水上開十旬無破塊九土信康哉

山行遇雨

唐孫逖

驟雨晝氤氲空天望不分暗山惟覺電窮海但生雲涉
澗猜行潦緣崖畏宿氛夜來江月霽棹唱此中聞

江閣對雨

唐

杜甫

南紀風濤壯陰晴屢不分野流行地日江入度山雲層
閣憑雷殷長空面水文雨來銅柱北應洗伏波軍

梅雨

杜甫

南京犀浦道四月熟黃梅湛湛長江去冥冥細雨來茅
茨疎易濕雲霧密難開竟日蛟龍喜盤渦與岸迴

船下夔州郭宿雨濕不得上岸別王十二判官

杜甫

依沙宿舸船石瀨月娟娟風起春燈亂江鳴夜雨懸晨
鐘雲外濕勝地石堂煙柔櫓輕鷗外含悽覺汝賢

春夜喜雨

杜甫

好雨知時節當春乃發生隨風潛入夜潤物細無聲野
徑雲俱黑江船火獨明曉看紅濕處花重錦官城

雨

杜甫

微雨不滑道斷雲踈復行紫崖奔處黑白鳥去邊明秋
日新霑影寒江舊落聲柴扉臨野碓半濕擣香杭

喜雨

杜甫

南國旱無雨今朝江出雲入空纔漠漠灑迴已紛紛巢
燕高飛盡林花潤色分晚來聲不絕應得夜深聞
和都官苗員外秋夜寓直對雨簡諸知己

唐

李嘉祐

多雨南宮夜仙郎寓直時漏長丹鳳闕秋冷白雲司螢

影侵階亂鴻聲出苑遲蕭條吏人散小謝有新詩

賦得暮雨送李渭

唐
韋應物

楚江微雨裏建業暮鐘時
漠漠帆來重冥冥鳥去遲
海門深不見浦樹遠含滋
相送情無限沾襟比散絲
裴端公使院賦得隔簾見春雨

唐
包何

細雨未成霖垂簾但覺陰
唯看上砌濕不遣入檐深
度隙霑霜簡因風潤綺琴
須移戶外屨檐溜夜相侵

雨夜贈元十八

唐
白居易

卑濕沙頭宅連陰雨夜天共聽檐漏滴心事兩悠然把
酒循環飲移牀曲尺眠莫言非故舊相識已三年

陰雨

白居易

嵐霧今朝重江山此地深灘聲秋更急峽氣曉多陰望
闕雲遮眼思鄉雨滴心將何慰幽獨賴此北窗琴

雨中招張司業宿

白居易

過夏衣香潤迎秋簟色鮮斜支花石枕卧詠蕊珠篇泥

寧非遊日陰沈好睡天能來同宿否聽雨對牀眠

孤山寺遇雨

白居易

拂波雲色重灑葉雨聲繁水鷺雙飛起風荷一向翻空濛連北岸蕭颯入東軒或擬湖中宿留船在寺門

細雨

唐李商隱

蕭灑傍迴汀依微過短亭氣涼先動竹點細未開萍稍促高高燕微蹊的的螢故園煙草色仍近玉門青

盧氏池上遇雨贈同遊者

唐溫庭筠

簾翻涼氣集谿上潤殘碁萍皺風來後荷喧雨到時寂
寥閒望久飄灑獨歸遲無限松江恨煩君解釣絲

登樓值雨

唐
李咸用

江徼多佳景秋吟興未窮送來松檻雨半是蓼花風浪
猛驚翹鷺烟昏叫斷鴻不知今夜客幾處卧鳴蓬

春霖

宋
韓琦

咫尺東郊路春霖絕未通銷閒生并思醒睡費茶功樓
迴昏昏霧窗寒霎霎風待晴桑陌上五馬恣聰瓏

真西山帥長沙禱雨

宋戴復古

出郭問農事家家笑語聲有田皆足水既雨亦宜晴山
下谿流急街頭米價平明朝閒領客相見賀秋成

曉雨

宋陸游

蕭瑟度橫塘霏微映繚牆壓低塵不動灑急土生香聲
入楸梧碎清分枕簟涼回頭忽陳迹檐角挂斜陽

和龍直夫祕校細雨

宋僧道潜

薄霧兼寒雨凌晨靄未分細宜池上見清愛竹邊聞斗

帳侵蘭夢虛櫺逼蕙薰晚來欣小霽釣箔映疎雲

雨

元
趙孟頫

撼撼衆葉響滋滋生意新知誰實揮灑解使盡圓勻蟲
網懸珠絡荷盤瀉汞銀喜涼生枕簟餘潤逼衣巾

江上雨

明
高啟

冥冥衆樹昏浩浩一江淪急有迴風韻輕無入霧痕鳥
啼叢竹嶺人卧落花邨門巷春泥滑誰來共酒尊

夏日喜雨

高啟

粉署依丹禁城高爽氣多好風天上至涼雨曉來過翠
島浮香霧瑤池淡綠波九重閒視草時復幸鑾坡

雨中舟行

明
于慎行

天闊雨冥冥孤帆過驛亭雲吞江樹白霧失曉峰青岸
鳥迎船濕河魚出網鯉生涯多少恨無處異飄萍

五言排律

奉和春日途中喜雨

唐
魏知古

皇輿向洛城時雨應天行麗日登巖送陰雲出野迎濯

枝林杏發潤葉渚蒲生絲入綸言喜花依錦字明微臣
忝東觀載筆佇西成

和李僕射雨中寄盧嚴二給事

唐
張籍

郊原飛雨至城闕濕雲埋迸點時穿牖浮漚欲上階偏
滋解籜竹并灑落花槐晚潤生琴匣新涼滿藥齋從容
朝務退放曠披曹乖盡日無來客閒吟感此懷

監試夜雨滴空階

唐
喻鳅

雲雲復泚泚飄松又灑槐氣濛蛛網檻聲疊鮮花階古
壁青燈動深庭濕葉埋徐垂舊鴛瓦競歷小茅齋冷與
陰蟲間清將玉漏諧病身惟展轉誰見此時懷

七言律

積雨輞川莊作

唐
王維

積雨空林煙火遲蒸梨炊黍餉東菑漠漠水田飛白鷺
陰陰夏木轉黃鸝山中習靜觀朝槿松下清齋折露葵
野老與人爭席罷海鷗何事更相疑

雨不絕

唐 杜甫

鳴雨既過漸細微
映空搖颺如絲飛
階前短草泥不亂
院裏長條風乍稀
舞石旋應將乳子
行雲莫自濕僊衣
眼邊江舸何恩促
未得安流逆浪歸

賀李觀察禱河神降雨

唐 耿 漳

質明齋祭北風微
騶馭千羣擁廟扉
玉帛纔敷雲澹澹
笙鏞未徹雨霏霏
路邊五稼添膏長
河上雙旌帶濕歸
若出敬亭山下作
何人敢和謝玄暉

途中望雨懷歸

唐 韋 莊

滿空寒雨漫霏霏，去路雲深鎖翠微。
牧豎遠當煙草立，飢禽閒傍渚田飛。
誰家樹壓紅榴折，幾處籬懸白菌肥。
對此不堪鄉外思，荷蓑遙羨釣人歸。

春雨即事寄襲美

唐 陸龜蒙

小謝輕埃日日飛，城邊江上阻春暉。
雖愁野岸花房凍，還得山家藥笥肥。
雙屐著頻看齒折，裘披苦見毛稀。
比鄰釣叟無塵事，灑笠鳴蓑夜半歸。

和子淵學士春雨

宋 韓琦

天幕沈沈淑氣溫
雨絲輕軟墜雲根
洗開春色無多潤
染盡花光不見痕
寂寞畫樓和夢鎖
依微芳樹過人昏
堂虛座密珠簾下
試問淳于醉幾尊

北堂春雨

韓琦

葉葉輕雲障薄羅
坐看膏澤灑庭柯
風前芳杏紅香減
煙外垂楊綠意多
聲落檐牙飛短瀑
點明池面起圓波
晴來西北憑闌望
拂黛遙峰濯萬螺

有美堂暴雨

宋

蘇軾

遊人脚底一聲雷，滿坐頑雲撥不開。
天外黑風吹海立，浙東飛雨過江來。
十分潏潏金尊凸，千杖敲鐙羯鼓催。
喚起謫仙泉灑面，倒傾蛟室瀉瓊瑰。

連雨漲江

蘇軾

急雨瀟瀟作晚涼，卧聞榕葉響空廊。
微明燈火耿殘夢，半濕簾帷浥舊香。
高浪隱牀吹甕盎，聞風驚樹擺琳琅。
先生不出晴無用，留向空階滴夜長。

次韻宏甫喜雨

宋 沈與求

黃壘初看卷麥禾老農還復厭晴多
四郊庠尾開新瀆一雨苗根長舊科
已發政聲歸召杜更教詩律闕陰何
王孫欲識田家樂水滿溝塍涉可過

久雨

宋 陸游

梅天一日幾陰晴對雨無聊醉不成
巧歷莫能知雨點孤桐那解寫谿聲
林深鳥雀來無數草茂鋤耰去即生
明日雲開天萬里御風吾欲過青城

芒種後經旬無日不雨偶得長句

陸游

芒種初過雨及時紗厨睡起角巾欹
癡雲不散常遮塔野水無聲自入池
綠樹晚涼鳩語鬧畫梁晝寂燕歸遲
閒身自喜渾無事衣覆薰籠獨誦詩

雨

陸游

映空初作繭絲微掠地俄成箭鏃飛
紙帳光遲饒曉夢銅鑪香潤覆春衣
池魚鱗鱗隨溝出梁燕翩翩接翅歸

惟有落花吹不去
數枝紅濕自相依

春雨

金
馮延登

小雨濛濛潤土膏
谷風習習不驚條
晨煙半濕低平野
春水初生沒斷橋
已見鶯黃勻柳麥
更看檀紫上榆椒
從今樂事知相繼
櫛比雲平看隴苗

春雨

元
楊載

濛濛春雨暗重城
莽若山林雲氣生
駕過東朝沾羽蓋
仗移前殿濕霓旌
蒼松密掩巖頭鶴
翠柳深藏谷口鶯

明日不愁花爛熳新晴陌上有人行

明照坊對雨

元
宋 賢

章臺車馬去如流白雨霏烟拂畫樓九陌平鋪明似練
兩溝急瀉碧于油美人虹見西山霽少女風來北里秋
涼意滿襟簾幕卷宮鴉歸樹夕陽收

雲巖值雨

明
高 啟

深殿長廊映竹開鳥聲忽斷雨聲催
蘚生偏上題詩壁
花落還臨說法臺
林下聞鐘諸客散
澗邊汲水一僧來

晚晴更好看山色西閣憑闌獨未迴

東郊時雨

明
李東陽

鳴鳩將雨過東林細草青郊望轉深潤入土膏春脈脈
暝含山色晝沈沈尋花問柳遊人興荷鋤扶犁野老心
見說帝城多景物春晴未必勝春陰

禁中對雨

明
沈一貫

回風度雨近金鑾高閣踈簾隱几看乳燕營巢欣土潤
嬌鶯擲柳怯枝寒添流欲染方春色拂座應憐獨冷官

目送餘雲過別殿不知銀鑰動闌干

五言絕句

夜雨

唐

白居易

早蛩啼復歇殘燈滅又明
隔窓知夜雨芭蕉先有聲

微雨夜行

白居易

漠漠秋雲起稍稍夜寒生
自覺衣裳濕無點亦無聲

滯雨

唐

李商隱

滯雨長安夜殘燈獨客愁
故鄉雲水地歸夢不宜秋

細雨

李商隱

帷飄白玉堂簾卷碧牙牀
楚女當時意蕭蕭髮彩涼

微雨

李商隱

初隨林靄動稍共夜涼分
窗迴侵燈冷庭虛近水聞

詠雨

唐
楊凝

塵裏多人路泥歸足燕家可憐
繚亂點濕盡滿宮花

雨

金
高汝勵

時雨雨三日田家家萬金
有年天子慶謀國老臣心

雜興

元周權

涼蟾淨如洗酒醒夜初寂山檐宿雨多空階響餘滴

雨中過玉遮山

明高啟

尋鐘入蒼茫一磴復一崦落葉去方深山扉雨中掩

江行

明李東陽

日出青蘋濕江渾路不分昨宵驅雨至知是海南雲

過澱湖泊石浦

明程元輔

沙蒲偃秋風湖雲藏夕雨何處遠行人飛帆下石浦

雨後雜興

明王叔承

秋雨欲浮邨青螺上牀脚日出過東鄰船頭繫籬落

七言絕句

春遊值雨

唐張旭

欲尋軒檻列清尊江上烟雲向晚昏須倩東風吹雨散
明朝却待入花園

苦雨聞包諫議欲見訪戲贈

唐盧綸

草氣樹烟咽不開繞牀連壁盡生苔常時多病因多雨

那敢煩君車馬來

雨聲

唐
元稹

風吹竹葉休還動
雨點荷心暗復明
曾向西江船上宿
慣聞寒夜滴蓬聲

聽雨聲寄盧綸

唐
李端

暮雨蕭疎過鳳城
霏霏颭颭重還輕
聞君此夜東林宿
聽得荷池幾番聲

宮詞

唐
王涯

霏霏春雨九重天
漸暖龍池御柳烟
玉輦遊時應不避
千廊萬屋自相連

謝亭送別

唐
許渾

勞歌一曲解行舟
紅葉青山水急流
日暮酒醒人已遠
滿天風雨下西樓

雨

唐
杜牧

連雲接塞添迢遞
灑幕侵燈送寂寥
一夜不眠孤客耳
主人窗外有芭蕉

咸陽值雨

唐 溫庭鈞

咸陽橋上雨如懸
萬點空濛隔釣船
還似洞庭春水色
晚雲將入岳陽天

登咸陽縣樓望雨

唐 韋 莊

亂雲如獸出山前
細雨和風滿渭川
盡日空濛無所見
鴈行斜去字聯聯

撫州江口雨中作

韋 莊

江上閒衝細雨行
滿衣風灑綠荷聲
金駟掉尾橫鞭望

猶指廬陵半日程

淮雨

宋
梅堯臣

雨脚射淮鳴萬鏃
跳點起漚魚
亂目濕帆遠
遠來未收
雲漏殘陽生半幅

六月二十七日望湖樓醉書

宋
蘇軾

黑雲翻墨未遮山
白雨跳珠亂入船
卷地風來忽吹散
望湖樓下水如天

舟行

宋
張耒

落景秋雲晚不開
天寒古岸野船回
初驚波面微瀾起
已覺風前細雨來

雨中

宋 鄒浩

五月陰沈久不開
冷風吹雨滿天街
老農莫漫憂蠶麥
丞相祈晴已宿齋

舟次龜湖

宋 朱棹

山雨疎疎心又驚
起瞻天色斗微明
他年一枕江關夢
知憶篷窗此夜聲

和喜雨

宋 朱子

黃昏一雨到天明
夢裏豐年有頌聲
起望平疇烟草綠
只應投筆事農耕

小雨

宋 楊萬里

雨來細細復疎疎
縱不能多不肯無
似妒詩人山入眼
千峰故隔一簾珠

秋雨

楊萬里

濕侵團扇不能輕
冷逼孤燈分外明
蕉葉半黃荷葉碧

兩般秋雨一般聲

冬夜聽雨戲作

宋
陸游

少年交友盡豪英
妙理時時得細評
老去同參惟夜雨
然香卧聽畫檐聲

小酌元衛弟聽雨

宋
樓鑰

小閣臨流暑氣清
藕花的的照人明
移牀更近欄邊坐
要聽砧聲雜雨聲

西城雨中

金
周昂

草露幽香不動塵
細蟬初向葉間聞
溟濛小雨來無際
雲與青山澹不分

山中雨

金
劉 昂

嵩高山下逢秋雨
破繖遮頭過野橋
此景此時誰畫得
清如窗外聽芭蕉

春早

金
段繼昌

斷冰消盡荻芽尖
凍壑蘇來白薺添
幾片野雲飛不去
晚風吹作雨纖纖

日晏

元
范棼

昨日相期早出邨今朝日晏未開門
可人一夜東風雨
綠徧天街舊草痕

宮詞

元
納新

廣寒宮殿近瑤池
千樹垂楊綠影齊
報道夜來新雨過
御溝春水已平隄

煙雨中過石湖

元
倪瓚

煙雨山前度石湖
一奩秋影玉平鋪
何須更剪松江水

好染空青作畫圖

其三

姑蘇城外短長橋
煙雨空濛又晚潮
載酒曾經此行樂
醉來江月卧吹簫

吳興道中

元張雨

扁舟偶趁采樵風
題扇書裙莫惱公
何處人間無六月
碧瀾堂上雨聲中

風雨早朝

明高啟

漏屋鷄鳴起濕烟
寒驢難借強朝天
却思春水江南岸
閒聽蓬聲卧釣船

題張元琛蓬窗

明

葉子奇

銀絲魚鱸碧芹羹
曾記扁舟越上行
今日小軒風味似
滿川風雨看雲生

口號

明

程嘉燧


漱壑淘林殷戶雷
冥冥松際失崔嵬
山窗五月寒如水
知是湖橋暮雨來

夏景

明
張宇初

深院碁聲日正長
博山添火試沈香
道人鞭起龍行雨
帶得東潭水氣涼

御定佩文齋詠物詩選卷十



總校官庶吉士臣侍朝

校對官中書臣王璵

謄錄監生臣陳煜

謄錄監生臣李承寧

欽定四庫全書薈要

集部

御定詠物詩選卷十一至

四

欽定四庫全書薈要卷一萬八千六百三十三

集部

御定佩文齋詠物詩選卷十一

霧類

五言古

詠霧

梁元帝

曉霧晦階前垂珠帶葉邊
五里浮長隰三晨暗遠天
傍通似佳氣却望若飛煙
疎簾還復密斷岫更疑連
還思逢樂廣能令雲霧褰

其二

三晨生遠霧五里閭城闌從風疑細雨映日似游塵乍
若飛煙散時如佳氣新不妨鳴樹鳥時蔽摘花人

舟行值早霧

梁
伏挺

水霧雜山煙冥冥不見天聽猿方忖岫聞瀨始知川漁
人惑澳浦行舟迷汴沿日中氛靄盡空水共澄鮮

賦得霧

梁
沈超

窈鬱蔽園林依霏被軒牖睇有始疑空瞻空復如有游

蛇隱遙漢文豹棲南阜既殊三五輝遠望徒延首

詠霧應詔

北周

王褒

七條開廣陌五里閭朝氛帶樓疑海氣含蓋似浮雲方
從河水上預奉綠圖文

賦得花庭霧

唐

太宗

蘭氣已熏宮新蕊半妝叢色搖輕重霧香引去來風拂
樹濃舒綠縈花薄蔽紅還當雜行雨彷彿隱遙空

凌霧行

唐

韋應物

秋城海霧重職事凌晨出浩浩合元天溶溶迷朗日纔
看含鬢白稍視沾衣密道騎全不分郊樹都如失霏微
誤噓吸膚腠生寒慄歸當飲一杯庶用蠲斯疾

水亭夜坐賦得曉霧

唐李益

月落寒霧起沈思浩通川宿禽轉木散山澤一蒼然漠
漠沙上路云云洲外田猶當依遠樹斷續欲窮天

五言律

賦得遠山澄碧霧

唐太宗

殘雲收翠嶺夕霧結長空帶岫凝金碧障霞隱半紅彷彿分初月飄颻度曉風還因三里處冠蓋遠相通

詠霧

唐
董思恭

蒼山寂已暮翠觀闇將沈終南晨豹隱巫峽夜猿吟天寒氣不歇景晦色方深待訪公超市將予赴華陰

詠霧

唐
蘇味道

氤氲起洞壑遙裔匝平疇乍似含龍劍還疑暎蜃樓拂林隨雨密度逕帶煙浮方謝公超步終從彥輔遊

霧

唐李嶠

曹公迷楚澤漢帝出平城
涿野妖氛靜丹山霽色明
類烟飛稍重方雨散還輕
儻入非熊繇寧思玄豹情

大霧過安慶

元傅若金

水郭浮蛟室雲帆度客星
江空連海白山遠入淮青
訪古聊須到乘流未可停
遙疑天柱曉風霧颭精靈

五言排律

晨霧

明楊慎

安寧之交杪秋初冬天將晴霽晨必大霧千
里一白如銀色界須臾日出霞彩輝煥亦奇
觀也

玄冥當凜節白霧翳晨朝明月朦朧閣清霜暖對橋冰
澌工織水花松慣封條嵐市天褰幕煙垞陸湧潮鳬疊
迷獨釣鹿徑滑歸樵文采南山豹威稜北塞貂駟星收
閃閃曦景煥昭昭梅信懸知近憑他酒旆招

七言律

早霧

宋 趙 抃

山光全暝水光浮數里
霏霏曉霧收露彩乍凝藏
漢殿日華不透掩秦樓
豈饒文豹遲留影應有靈蛇取次遊
聖世妖氛消已盡結成佳氣滿南州

花霧

元 謝宗可

倦紫酣紅總未醒
暗薰芳液滴無聲
羅幃隱繡迷春色
綺縠籠香護曉晴
薄暝枝頭留睡蝶
輕陰樹底咽啼鶯
東風卷到闌干曲
半濕游絲舞不成

詠霧凇

明楊慎

怪得天雞誤曉光青腰玉女試銀妝
瓊敷綴葉齊如剪瑞樹開花冷不香
月白詎迷三里霧雲黃先兆萬家箱
貧兒飯甕歌聲好六出何須賀謝莊

忠州霧泊

明鍾惺

漁艇官舟曉泊同蜀江愁霧不愁風
煙生野聚汀寒外雲滿山城水氣中
曲岸川迴翻似盡遙天峰沒却如空
依稀往日丹楓路稍見霜前遠近紅

五言絕句

閒泛

明僧大遂

無事亦波間孤舟覺自閒
樹邊春霧斂尖露幾重山

七言絕句

霧松

宋曾翠

園林日出靜無風霧松花開樹樹同
記得集賢深殿裏
舞人齊插玉瓏璁

房陵

宋陳造

陰晴未敢捲簾看
苦霧濛濛尚未乾
政使病餘剛止酒

一杯要敵滂朝寒

自注晨起霧久乃散土人目曰滂朝

霧中見靈山依約不真

宋

楊萬里

東來兩眼不曾寒
四顧千峰掠曉鬟
天欲惱人消幾許
只教和霧看靈山

曉行

宋

葛長庚

雨餘花點滿紅橋
柳絮沾泥夜不消
曉霧忽無還忽有
春山如近復如遙

水邨霧

葛長庚

淡處還濃綠處青江風吹作雨毛腥起從水面縈層嶂
恍似簾中見畫屏

夾蘿峰

明顧源

紅日纔生暘谷東魚龍吹浪曉濛濛徜徉笑指三山路
玉竈銀牀紫霧中

題米元暉山水小景贈陳原貞別

明僧似杞

江頭雨足春水生江上青山煙樹暮扁舟明發去如飛
目斷征帆入蒼霧

御定佩文齋詠物詩選卷十一

欽定四庫全書薈要卷一萬八千六百三十四

集部

御定佩文齋詠物詩選卷十二

露類

四言古

甘露頌

北齊

邢邵

休徵屢動感極迴天流甘委素玉潤氷鮮密房下結珠
琲上懸布覆林野灑散旌旃

芳林園甘露頌

北齊

梁神海

福以德彰慶沿業皎矧茲嘉露因祥特表翻潤星夕流
甘月曉奇越彫氛珍逾素鳥至道伊融大化期肇惟此
大化實感天眷降液丹墀飛津綺殿九服依風八荒改
面敢述勝詞式旌舞作

五言古

賦得露

梁
顧煊

飛空猶蘊狀集物始呈華萎黃壓秋筍厭浥長春芽非
惟溥蔓草頗亦變叢葭仍增江海浪聊點木蘭花

驚早露

梁劉憺

九畹凝芳葉百草瑩新珠盈荷雖不潤拂竹竟難枯

詠采甘露應詔

陳江總

祥露曉氛氤上林朝晃朗千行珠樹出萬葉瓊枝長徐
輪動仙駕清晏留神賞丹水波濤泛黃山煙霧上風亭
翠旆開雲殿朱紘響徒知恩禮洽自漸名實爽

應詔甘露詩

北齊邢邵

膏露且漸洽凝液汨旌旂草木盡沾被玉散復珠霏誰

謂穹昊遠道合若應機

詠露

唐
董思恭

夜色凝仙掌晨甘下帝庭不覺九秋至遠向三危零蘆渚
花初白葵園葉尚青晞陽一灑惠方頒益滄溟

尹相公京兆府中棠樹降甘露詩

唐
岑參

相國尹京兆政成人不欺甘露降府庭上天表無私非
無他人家豈少羣木枝被茲甘棠樹美掩召伯詩團團

甜如蜜晶晶凝若脂千柯玉光碎萬顆珠葉垂崑崙何
時來慶雲相逐飛魏宮銅盤貯漢帝金掌持王澤布人
和精心動靈祇君臣日同德禎瑞方潛施何術令大臣
感通能及茲忽驚政化理暗與神物期却笑趙張輩徒
稱古今稀為君下天酒麴葉將用時

五言律

秋露

唐
駱賓王

玉闕寒氣早金塘秋色歸泛掌光逾淨添荷滴尚微變

霜凝曉液承月委圓輝別有吳臺上應濕楚臣衣

露

唐
李嶠

滴瀝明花苑歲蕤泣竹叢玉垂丹棘上珠湛綠荷中夜
警千年鶴朝零七月風願凝仙掌內長奉未央宮

白露

唐
杜甫

白露團甘子清晨散馬蹄園開連石樹船渡入江谿憑
几看魚樂迴鞭急鳥棲漸知秋實美幽徑恐多蹊

五言排律

賦得金莖露

唐 徐敞

漢帝貴長生延年餌玉英
銅盤滴珠露仙掌抗金莖
拂曙氛埃斂凌空沆瀣清
岩堯捧瑞氣龍從出宮城
勢入浮雲聳形標霽色明
大君當御宇何必去蓬瀛

賦得清露被臯蘭

唐 孫顧

九臯蘭葉茂八月露華清
稍與秋陰合還將曉色并
向空羅細影臨水泣微明的
皦添幽興芊繇動遠情
夕芳人未采初降鶴先驚
為感生成惠心同葵藿傾

賦得春草凝露

唐
張友正

蒼蒼芳草色含露對青春已賴陽和長仍慙潤澤頻日
臨殘未滴風度欲成津蕙葉垂偏重蘭叢洗轉新將行
愁裏徑欲采畏濡身獨愛池塘畔清華遠襲人

五言絕句

詠露珠

唐
元稹

秋荷一滴露清夜墜元天將來玉盤上不定始知圓

七言絕句

奉和三日祓禊渭濱應制

唐張說

青郊上巳艷陽年
紫禁皇遊祓渭川
幸得歡娛承湛露
心隨草樹樂春天

甘泉歌

唐王昌齡

乘輿執玉已登壇
細草沾衣春殿寒
昨夜雲生拜初月
萬年甘露水晶盤

長安秋夜

唐李德裕

內官傳詔問戎機
載筆金鑾夜始歸
萬戶千門皆寂寂

月中清露點朝衣

秋思

唐王涯

宮連太液見滄波
暑氣微消秋氣多
一夜輕風蘋末起
露珠翻盡滿池荷

露

唐袁郊

湛湛騰空下碧霄
地卑濕處更偏饒
菅茅豐草皆沾潤
不道良田有旱苗

野塘

唐韓偓

侵曉乘涼偶獨來不因魚躍見萍開
卷荷忽被微風觸瀉下清香露一杯

中秋前偶成

元虞集

空林月落大如盤雞犬無聲曉氣寒
童子擬謀朝一食玉杯盛得露漙漙

上京即事

元薩都拉

五更寒襲紫毛衫睡起東窗酒尚酣
門外日高晴不得滿城濕露似江南

絕句

元 吳景奎

蘆花方褥竹方牀
葛帳含風薤簟涼
半夜起來山月白
滿天清露灑衣裳

江上曲

明 劉基

月出前山青
魚寒雁聲遙
下碧雲端草頭錯
認驪珠吐
自是西風白露團

小游仙

明 王澤

獨繞瑤壇歌洞章
青天如水月華涼
閒將一掬芙蓉露

乞與神龍作雨香

御定佩文齋詠物詩選卷十二